


Paslawon ang mapintas nga kontra-rebolusyonaryong gera sang rehimeng US-Duterte! Magpursiger nga isulong ang inaway banwa!



Komite Sentral Partido Komunista sang Pilipinas

Hugot nga ginasaluduhan sang Komite Sentral ang tanan nga Pulang hangaway kag kumander sang Bagong Hukbong Bayan (BHB) sa okasyon sang ika-52 anibersaryo sini. Sa adlaw nga ini, hugot sa tagipusuon nga ginakilala namon ang malig-on kag ubos-kusog nga mga pagpaninguha, ang mga naangkon kag sakripisyo nga ginhimo sang BHB sa pagpangapin sa pumuluyo kag pagpasulong sang inaway banwa sa atubang sang mapintas kag mahigko nga kontra-rebolusyonaryong gera sang pasista nga rehimeng US-Duterte.

Ginahatagan namon sang pinakamataas nga pagpasidungog ang tanan nga Pulang hangaway kag kadre sang Partido nga naghalad sang ila kabuhi samtang nagaalagad sa pumuluyo kag rebolusyonaryo nga katuyuan. Ang mga ngalan nila tubtob buhi nga nakaukit bilang mga baganihan kag martir sa kasaysayan sang dungganon nga paghimakas

sang pumuluyong Pilipino para sa pungsodnon kag pangkatilingban nga kahilwayan.

Sa adlaw nga ini, nagakadapat lang nga hatagan sang espesyal nga pagpasidungog sang Partido, upod sang bug-os nga BHB, si Antonio Cabanatan (Ka Manlimbasog), anay katapu sang Komite Sentral, Kawanihan Pangpulitika kag Komite nga

Tagapatuman, nga gindukot sang nagligad nga tuig upod sang iya asawa nga si Florenda Yap (Ka Osang), tago nga ginkulong, gintortyur sang pila ka bulan antes brutal nga ginpatay sang mga tala-wan nga mga manugpatay-tawo ni Duterte.

Si Ka Manlimbasog, nga nagretiro sang 2017 halin sa matag-adlaw nga hilikuton rebolusyonaryo, nalakip sa mga maisog nga tagahawan sang dalan nga nanguna sa pagpalapad sang hangaway sang banwa sa Visayas kag Mindanao. Daku ang nangin kontribusyon niya sa pagpabaskog kag pagpalig-on sang rebolusyonaryong kahublagaan.

Nagapasidungog man ang Parti-

do kay Rosalino Canlubas (Ka Yuni), pangrehiyon nga kumander sang BHB sa Cagayan Valley kag pangaduha nga sekretaryo sang Komite sang Partido sa rehiyon, nga napatay sa isa ka engkwentro sang Marso 15 sa Isabela. Si Ka Yuni kabahin sa mga bataon nga kadre nga napilian sa Ikaduha nga Komite Sentral bangud sa iya bulawanon nga mga amot sa pagpasulong sang inaway sa Southern kag Western Mindanao.

Gamiton naton ang okasyon nga ini para timbangon ang aton kusog paagi sa pagtumod lunsay sang aton mga naagum kag mga pagkulang sa nagligad nga tuig. Tinguhaon naton nga labing pauswagon ang aton mga kalakasan kag pangibabawan ang mga kahuyangan para mangin mas maayo sa pagpasulong sang inaway banwa paagi sa malapad kag ma-singki nga paglunsar sang pagpakig-away gerilya sa nagalapad kag nagadalom nga baseng masa. Dapat man naton tun-an ang mga kalakasan kag kahuyangan sang kaaway agud makahimo sang mga plano, estratehiya kag taktika para paslawon ang wala-untat kag brutal nga gera sini batuk sa pumuluyo.

Ang inaway banwa nga ginalunsar sang BHB, sa idalom sang absoluto nga pagpamuno sang PKP, kabahin sang 500-tuig nga nagapadayon nga armadong pagbato sang pu-

muluyong Pilipino batuk sa mga dumuluong nga manugpigog kag manughimulos, nga may una nga kadalang-an sadtong Abril 27, 1521 sa Battle of Mactan kon sa diin nalutos ni Datu Lapu-Lapu ang guban sang mga mananakop sang Espanya sa pagpanguna ni Ferdinand Magellan. Sa sulod sang lima ka siglo, sa idalom sang 300-tuig nga kolonyal nga pagginahum Espanyol kag masobra isa ka siglo nga kolonyal kag malakolonyal nga pagpanghimulos sang US, ang pumuluyong Pilipino nagpursiger nga naglunsar sang rebolusyonaryo nga armadong pagbato para maagum ang tunay nga pungsodnon nga kahilwayan.

Ang labing nagalala nga sitwasyon sosyo-ekonomiko sang pumuluyong Pilipino nagapabilin nga tumang ka paborable para sa pagpasulong sang malapad kag maigting nga pagpakig-away gerilya. Paagi sa korapsyon, kontra-pumuluyo nga mga polisiya, kag pasistang pagpamigos, ginapalala sang rehimeng US-Duterte ang krisis sang nagaharing sistema nga malakolonyal kag malapyudal kag nagpapanaog sang mas grabe nga pag-antus kag pagpamigos sa malapad nga masa sang pumuluyong Pilipino.

Dala sang nagligad nga tuig ang wala tupong nga lapnagon nga pag-antus sang masa sang mga mamumugon, mangunguma, malaproletaryado kag mga petiburges tuga sang palpak nga pag-atubang sa pandemya nga Covid-19. Sa pag-sandig sini sa mga restriksyon nga militar kag pulis imbes nga magpatuman sang ginakinahanglan nga mga tikang sa ikaayong lawas, ginguba sang reaksyunaryong rehimen ang ekonomya kag pangabuhian sang pumuluyo samtang napaslawan nga punggang ang nagapadayon nga paglapta sang mga impeksyon.


Imbes nga sabton ang pandemya paagi sa pagtalana sang bastante nga resorsa sa mga tikang sa ikaayong lawas, mas ginpili sang rehi-

meng US-Duterte nga magbakal sang mas madamo nga bomba kag kanyon para sa todo nga opensiba militar sini sa mapaslawan nga katuyuan nga lutuson ang BHB antes matapos ang upisyal sini nga termino. Sa paghandum nga lutuson ang BHB, tuyo sang nagahari nga guban Duterte nga piangon ang tanan nga porma sang pagbato sang demokratico kag progresibong mga pwersa para hatagan-dalan ang pagpalawig lampas 2022 sang dinastiya sini sang korapsyon, pasismo kag pungsodnon nga pagtraidor.


Ang wala untat nga mga operasyon sang kaaway nagatarget sa masang mangunguma kag nagatuga sang mga grabe nga pagpang-abuso kontra sa ila. Tuyo sang kaaway nga pihak-pihakon ang pumuluyo kag dugmukon ang ila pagbato paagi sa pagpapanaog sang pagginahum nga garison sang militar sa mga komunidad, nga ang pinakatuyo nga ihamulag ang hangaway sang banwa kag itulod ini sa sitwasyon nga puro-militar kon sa diin bulnerable ini sa dalagkuan nga mga atake.


Kadungan sini, tuyo sang kaaway nga waskon ang hayag nga demokratiko nga kahublagang masa kag lakip ang konserbatibo nga oposisyon nga nakabase sa kasyudaran.

Ang rebolusyonaryo nga armadong paghimakas padayon nga nagapursiger sa atubang sang brutal nga kontra-rebolusyonaryong gera sang kaaway. Ang mga yunit sang BHB lubos nga nagatinguha para panginbabawan ang mga kabudlayan kag kapigaduhon nga ginadulot sang mga mapintas nga opensiba sang kaaway. Determinado sila nga pabaskugon ang ila angut sa masang mangunguma, pangapinan kag buligan sila nga magbato kag isulong ang ila antipyudal kag antipasista nga mga paghimakas. Paagi sa pagpangibabaw sa mga kahuyangan kag kabudlayan, determinado ang BHB nga paslawon ang todo nga opensiba sang kaaway kag magpabaskog.



Espesyal nga Isyu | Marso 29, 2021

 @prwc_info

 cppinformationbureau@gmail.com

Ang *Ang Bayan* ginabantala duha ka beses kada bulan sang Komite Sentral sang Partido Komunista ng Pilipinas

Hagmak gihapon sa resesyon ang pangkalibutanon nga kapitalistang sistema

GINALAMON ANG PANGKALIBUTANON NGA SISTEMANG KAPITALISTA sang isa ka pangkalibutanon nga resesyon sang nagligad nga tuig kon sa diin ang pandemya nga Covid-19 napaslawan nga gin-atubang sang mga gubyrno nga indi handa kag kulang sa kapasidad bangud sa mahina nga sistema sa ikaayong lawas nga gingaruk sang pila ka tuig nga mga neoliberal nga kaltas sa badyet. Naghabyog ang kadam-an sang mga gubyrno sa pagpapanaog sang mga *lockdown* kag restriksyon sa produksyon, pakignegosyahanay kag paghulag sang mga tawo. Ang mga tikang nga ini nagpabagsak sa bug-os nga mga ekonomya, nagguba sa mga gamay nga mga negosyo kag mga daku nga kumpanya, kag labi nga nagkonsentrar sang kapital sa kamot sang pila ka monopolyo kapitalista.

Naglab-ot sa 33 milyon ang permanente nga nadulaan sang trabaho kag 81 milyon pa ang temporaryo nga nadisempleyo. Nagsadsad sang 42% ang direkta nga dumuluong nga pamuhunan halin \$1.5 trilyon sang 2019 pakadto sa \$859 bilyon sang nagligad nga tuig, kag ginalauman nga labing magabagsak sang 5-10% subong nga tuig. Sa bilog nga kalibutan, ang mga ekonomya ginapalutaw na lang sang mga daku nga dumuluong nga pagpangutang nga nagtambak sang \$24 trilyon sa malabukid nga \$281 trilyon nga pangkalibutanon nga dumuluong nga utang, ukon masobra 355% sang pangkalibutanon nga *gross domestic product* (GDP).

Nag-umpisa sang Disyembre ang pagpaguwa sang higante nga mga kumpanya sa parmasyutika sang bakuna batuk sa Covid-19. Para sa sangkatawhan kuno ang produksyon, pagbaligya kag distribusyon sang mga bakuna, pero, labi lamang naghayag sa kapitalista nga kadaluk sa ganansya kag sa makikaugalingon nga interes sang mga imperyalista. Bangian ang distribusyon sang mga bakuna kag nagapabor sa mga daku nga kapitalistang pungsod. Sa unang bahin sang Marso, naglab-ot na sa 380 milyong bakuna ang nainiksyon sa bilog nga kalibutan, kon sa diin masobra katunga (55%) konsentrado sa United States, China, European Union kag United Kingdom, samtang ang iban pa pagatulungaon sang 125 pungsod.

Maluwas sa ginalauman nga binilyong dolyar nga ginabulsa nga ganansya sang mga daku nga kumpanya sa parmasyutika (nga madamo nagbaton sang pondo pangpubliko sa produksyon sang bakuna), wala gihapon sang kasiguruhan ang napanahon kag bastante nga pagpanagtag sang mga bakuna. Indi gihapon sigurado kon magaiigo bala ang suplay sang bakuna sa tanan nga pungsod, kag kon epektibo bala ini nga mapauntat ang paglapta sang bayrus kag sang lainlain nga nagtuluhaw nga mga baryant. Duha ka bulan makaligad ang mga distribusyon, liwat nagpatuman ang pila ka pungsod sang mga tikang nga *lockdown* sa atubang sang pagtimbuok sa numero sang mga bag-ong kaso.

Ang pangkalibutanon nga resesyon sang 2020 nagpalala sa madugay na nga istagnasyon sa ekonomya halin pa 2008 nga nagbunal sa mayor nga mga sentro sang kapitalismo nga indi mahaw-as sa kabug-at sang problema sang kapitalista nga sobrang produksyon kag nagatibusok nga tantos sang ganansya. Bisan nakasadsad ang mga ekonomya kag untat ang produksyon, nagapabilin nga mataas ang produktibo nga kapasidad nga bunga sang padayon nga sobrang suplay sa mayor nga mga produkto, partikular na ang salsalon, mga lamigas, krudong langis kag mga produktong petrolyo, labi na nga nag-untat ang internasyunal nga negosyahanay kag nagti-

busok ang baligyaanay.

Wala tupong ang lebel sang produksyon kag wala nabaligya nga imbentaryo sang salsalon sa China sang nagligad nga tuig. Para pungan ang pagnubo sang presyo sang krudong langis, nagkasugot ang Saudi Arabia, Russia kag OPEC sang nagligad nga bulan nga palaparon pa ang pagbuhin sang produksyon. Bisan pa man, sobra-sobra ang mga produktong petrolyo nga ginarepina sa China, nga nagpanubo sa tantos sang ganansya kag nagtulod sa pag-sira ukon pagbuhin sa operasyon sang mga planta sa pagrepina sa Singapore, Australia kag iban pang pungsod.

Pagkatapos ang pila ka tuig nga sobra ang suplay, may temporaryo nga kakulangan sa suplay sang mga *semiconductor* sa atubang sang wala ginalauman nga madamuan nga pagtaas sang demand para sa mga kompyuter, *tablet*, *smartphone*, camera kag iban pang elektroniko nga gadyet para sa komunikasyon, areglo nga *work-at-home*, *distance learning* kag kalingawan sa balay nga gindulot sang mga tikang sa pandemya. Otsenta porsyento sang pangkalibutanon nga produksyon sang mga *chip* konsentrado sa South Korea kag Taiwan.

Nagapalumbaanay subong ang mga monopolyo kapitalista sa US kag China sa pagbuhos sang binilyong dolyar nga kapital sa produksyon sang mga electronic *chip*. Sa partikular, sa idalom sang bag-o nga layi nga National Defense Authorization Act, ginaduso man sang gubyrnong Biden ang suporta kag kapital sang estado para sakdagon ang lokal nga produksyon sang *semiconductor* sa katuyuan nga makuha ang daku nga bahin sang nagadaku nga baligyaanay sini. Kadungan ini sang pamuhunan sang estado sa panalawsaw kag produksyon militar. Pareho sa US, gindeklarar sini lang sang China nga isa sa pra-

yoridad sang 5-tuig nga programa sini ang pagpanalawsaw kag produksyon sang *semiconductor*, upod ang *artificial intelligence*, *quantum computing*, *biotechnology*, *space research* kag iban pang mga bag-o nga teknolohiya.

Pila ka trilyong dolyar ang ginabuhos sang mga abante nga kapitalistang pungsod sa mga programa nga pangpasikad para padasigon ang liwat nga pagbuhi sa ila mga ekonomya, pero nagatuga man sang katalagman sang sobra nga pag-init sang ekonomya kag sang bukang utang nga mahimo maglupok sa maabot nga mga tuig. Sa tikang nga magapataas sa utang sang US sa doble kadaku sang ila ekonomya, ginaprubahan sini lang sang gubernong Biden ang isa ka \$1.9 trilyon nga programa nga pangpasikad sa ekonomya nga magpanagtag sang kwarta sa halos tanan nga Amerikano para buyukon ang pagpamakal, kag pagpanagtag sang subsidyo sa lokal nga produksyon. Ginatos ka bilyon nga dolyar man ang plano nga gastuhon sang iban nga mayor nga kapitalistang pungsod para papagsikon ang tagsa-tagsa nila ka ekonomya, pareho sang Japan (US\$710 bilyon), Germany (US\$250 bilyon), United Kingdom (US\$210 bilyon) kag France (US\$210.5 bilyon). Target man sang China nga lab-uton ang 6% paglapad sang ekonomya paagi sang pagpondo sa operasyon sang mga korporasyon nga ginapanagiyahan sang estado.

Pagaantuson sang mayorya sang atrasado nga ekonomya ang malawigan nga epekto sang pangkalibutanon nga resesyon sa ekonomya. Wala sang tupong ang 124 milyong dugang sa mga nahagmak sa sobra nga kaimulon (nagakabuhi sa kulang sa US\$2 kada adlaw) sang nagligad nga tuig, kag ginalauman nga magalab-ot pa sa 150 milyon subong nga 2021. Labing naglala ang indi pagkaalalangay sa pag-antus sang mga mamumugon kag mangunguma sa pinakamalala nga epekto sang mga *lockdown* sa ekonomya. Sa desperasyon nga haw-

son sa pagkabangkarote, mapwersa ang mga atrasado nga ekonomya nga mangutang kag magpatuman sang dugang nga liberalisasyon sa mga ekonomya kag ilansang ang mga sweldo sang mga mamumugon sa pag-unahay nga ganyaton ang dumuluong nga kapital kag pamuhunan.

May pauna nga patimaan nga mas mangin agresibo sa militar ang bag-o nga gubernong Biden sa US sa atubang sang nagsingki nga ribalan nga inter-imperyalista. Nagdeklarar si Biden nga mas ubos kusog niya nga pagasiguruhon ang pang-ekonomya kag pangpulitika nga interes sang US sa atubang sang nagadaku nga paghangkat sang imperyalistang karibal sini nga China. Nag-ehersisyo militar ini sini lang gamit ang duha ka *carrier strike group* sa South China Sea kag Taiwan Strait nga direktangangkat sa pag-angkon sang China sa mga internasyunal nga kadagatan sini. Liwat sini nga ginbuhi ang pagtukod sang Quadrilateral Security Dialog sa tunga sang US, Japan, India kag Australia sa tuyo nga maipusisyon ang mga pwersa kag armas militar sang US sa mga pungsod nga ini kag labing ipiton ang China sa ekonomya, militar kag pulitika.

Sa Middle East, halos isa ka bulan pa lang nga nakapungko si Biden sang ginmandu ang atake nga misayl sa Syria, lapas sa soberano nga teritoryo sini batuk kuno sa transportasyon sang armas halin sa Iran. Wala sapayan nga ginpalawig sang US ang kasugtanan sa Russia nga New Start, nga nagalimitar sa produksyon sang estratehikong mga armas nga opensibo, wala pa ini sang ginnaanunsyo nga plano nga mag-atras sa pagpauswag kag produksyon sang mga armas nukleyar kag mga *intermediate-range* nga misayl nga ginpaaktibo sa idalom sang gubernong Trump. Bisan may nauna nga promisa, wala pa ginbalik sang US ang kasugtanan nukleyar sa Iran kag wala pa ginkuha ang pagpangipit kontra sini sa pihak sang pahayag sang Iran nga handa ini nga

magsunod sa nauna nga mga kasugtanan.

Mas agresibo nga ginaduso sang China ang kontrol sini sa Hong Kong kag Taiwan kag ginapadayon ang armadong presensya sini sa South China Sea para kontrahon ang hangkat sang US sa kadagatan. Nag-igrab ang inaway sa dulunan sini sa India nga nagahana nga magasingki pa. Nagbukas ang Russia sang bag-o nga baseng nabal sa Sudan agud imentinar ang presensya sini sa Red Sea, nga kaangut sang erport nga base sini sa Syria kag baseng nabal sa Yemen, para imentinar ang ikasarang nga kontrolon ang estratehikong ruta sa Middle East kag alagyan padulong sa Africa.

Sa atubang sang pag-init sang ribalan nga inter-imperyalista, nagadaku ang gasto militar sang magkaribal sa pihak sang grabe nga krisis sa pangkalibutanon nga ekonomya. Sang nagligad nga tuig, nagdaku sang 3.9% pakadto US\$1.83 trilyon ang gasto militar, duha sa tatlo sa US kag China. Nagapabilin nga pinakamataas nga lebel sa nakalipas nga 30 tuig ang eksport sang mayor nga mga armas, kon sa diin ang bahin sang US nagtaas sang 37%.

Ang nagalala nga kahimtangan sosyo-ekonomiko kag pagpanalakay sa mga kinamatarung sibil nagagatong sa mga pagbato sang pumuluyo sa nagkalainlain nga bahin sang kalibutan sa atubang sang pandemya nga Covid-19. Padayon nga nagaigrab sa US kag Europe ang mga welga sang mga mamumugon sa transportasyon, mga pabrika, restawran kag mga tindahan nga nagapangayo sang dugang nga sweldo kag luwas nga lugar sa pagtrabaho. Halin Pebrero, wala untat ang mga aksyong masa sang ginatos ka libo nga pumuluyo sa Myanmar kontra sa kudeta militar. Nagapadayon man ang lapnagon nga protesta sang mga mangunguma sa India. Ginlunsar man ang mga protestang masa sa Brazil, Greece, Thailand, Russia kag iban pang pungsod nga nagaduso sang demanda sang pumuluyo sa tunga sang pandemya kag magabato

sa nagasingki nga pagpamigos sang militar kag pulis.

Sa tunga sang pangkalibutanon nga krisis sang kapitalismo, nagatuhaw ang hayagan nga pasistang rehimen sa nagadamo nga pungsod. Wala pili ang mga pag-atake sa mga demokratiko nga kinamatarung. Ang malala nga kahimtangan sosyo-eko-

nomiko kag pagpamigos sang estado nagatuga sang kundisyon para sa kakinahanglanon kag gilayon nga armadong pagbato. Ang tuman nga pagpanghimulos sa idalom sang neoliberal nga polisiya sang walapugong nga kadaluk, pagpamigos sang terorismo sang estado kag pasismo, kag mga gerang agresyon na-

gadabok sang nagkalainlain nga porma sang pagbato sa bilog nga kalibutan. Ang mga pangmasang paghimakas anti-imperyalista kag demokratiko kag ang mga armado nga rebolusyonaryong kahublagan mga preparasyon sa liwat nga pagbalod sang pangkalibutanon nga proletaryong rebolusyon.

Nagasingki ang terorismo sang estado kadungan sang iskema ni Duterte nga palawigon ang pasista nga pagginahum lampas sa 2022

MAY MAS O MENOS 450 ADLAW na lang ang rehimeng Duterte antes matapos ang upisyal nga termino, gani labing nangin desperado kag brutal ini sa pagdalasa sa tanan nga sablag sa iskema sini nga ipapanaog sa banwa ang pasistang diktadurya kag palawigon sa poder ang dinastiya pangpulitika sini. Ang korapsyon, pagpatuyang sa militar kag pulis kag masupog nga mga polisiya nga neoliberal nagbangkarote sa reaksyunaryong estado, naglubong sa pungsod sa malabukid nga utang, nagpalubha sa krisis kag naghayag sa garuk nga ubod sang nagaharing sistema nga malakolonyal kag malapyudal.

Sa nagligad nga tuig, nagbalibad ang rehimeng Duterte nga itigana ang resorsa sang estado sa kinahanglanon nga mga tikang para sa pangpubliko nga ikaayong lawas pareho sang *mass testing* kag madasig nga *contact tracing* agud kontrolon ang pandemya. Nagbalibad ini nga pabaskugon ang sistema sang pangpubliko nga ikaayong lawas nga ginbayo sang pila ka tuig nga pagkinaltas sa badyet. Sa baylo, ginhingalitan sini ang krisis sa ikaayong lawas para ipapanaog ang anti-demokratiko nga mga restriksyon, idalasa ang Anti-Terror Law kag labing hatagan sang kahilwayan ang pulis kag militar sa wala pili nga madamuan nga pagpamatay.

Naglala ang burukratikong korapsyon sa pag-angkon ni Duterte sang indi kinaandan nga gahum para isaylo ang kwarta sang banwa sa bulsa sang iya pamilya kag mga kroni kag para sa sobra nga gasto militar. Nabara pati ang pagbakal sang bakuna sa mga negosasyon nga imbolbado ang magkaribal nga burukrata nga nagalagas sang suhol kag kikkak. Ginhusgahan sang mga siyentista ang Pilipinas bilang isa sa may pinakamalaut nga sabat sa pandemya nga Covid-19. Bangud diri,

nagapabilin nga bulnerable ang mga Pilipino sa impeksyon nga Covid-19. Ginaatubang subong sang pungsod ang panibag-o nga pagtimbuok sa numero sang impeksyon pangunahon bangud nagapabilin nga wala sang mga tikang sa ikaayong lawas samtang bukas na ang mga pabrika, *mall* kag iban pang empresa, kag nagtuhaw ang mas makalalaton nga baryant sang bayrus.

Ang pinakamalaut nga aspeto sang malakolonyal kag malapyudal nga sistema ginpalubha sang palyado nga sabat sa pandemya nga Covid-19. Sa pagsandig sa *lockdown* para punggang ang paglapta sang pandemya, ginhagmak ni Duterte ang ekonomya sang Pilipinas sa grabe nga krisis. Nagtibusok sang 9.5% ang GDP sang pungsod sang 2020. Samtang nabangkarote kag nagsira ang pila ka pulo ka libo nga mga gamay kag medyum nga negosyo, madasig naman nga nabawi sang mga daku nga burgesya kumprador ang inisyal nga pagkaputo kag nagkuripon sang binilyon ka pisos nga ganansya, samtang nagabenepisyo sa mga kaltas sa buhis kag iban pang insentiba.

Bangud nagbalibad ang rehimeng Duterte nga sayluhon ang

pondo nga pangkorapsyon kag para sa sobra nga gasto militar, naghabyog ini sa daku nga dumuluong nga pagpangutang para kuno sa pagatubang sa pandemya. Sang 2020, naghulam ini sang dugang nga ₱2.1 trilyon gani naglabot ang kabilugan nga pangpubliko nga utang sa ₱9.8 trilyon sang katapusan sang tuig. Labi pa ini nga naduso sa ₱10.33 trilyon bangud wala sang untat nga pagpangutang. Labaw san-o pa man, indi na masarangan nga mabayaran ang pangpubliko nga utang.

Ang malapad nga masang Pilipino ang pangunahon nga ginbunulan sang mga *lockdown* kag tikang nga mapiguson. Labi nga nagsadsad ang kahimtangan sosyo-ekonomiko sang mga mamumugon, mangunguma, malaproletaryado kag manubo nga petiburgesya. Sang Enero, masobra 10.5 milyong Pilipino ang nadulaan sang trabaho nga rason sa pagtimbuok sang tantos sa disempleyo kag kulang sa trabaho sa istoriko nga lebel. Nag-antus sila sang mga pagkaltas sa sweldo, pagkadula sang kita, nagatinataas nga presyo, mas pabug-at nga buhis kag iban pang mapiguson nga tikang sa atubang sang grabe nga krisis sa ekonomya.

Ginaduso sang maki-liberalisasyon nga mga masupog nga sulugon ni Duterte nga labi nga liberalisasyon sang ekonomya paagi sang pagbag-o sa 1987 konstitusyon agud pahanugutan ang mga dumuluong nga angkunon sang lubos ang mga natural nga resorsa kag pangekonomya, kag mga empresa, kag

para sa posibilidad nga ilusot ang pagkuha sa takda nga panahon sa poder. Tuyo nila lubos nga dulaon ang mga elemento sang pungsodnon nga kapital kag himuon nga eksklusibo nga kaharian ang ekonomya sang mga dumuluong nga monopol-yo kapitalista kag katuwang nga mga daku nga kumprador.

Sang Pebrero, gindalasa man sang reaksyunaryong kongreso ang Create Law agud kaltasan ang buhis sang mga korporasyon halin 30% pakadto sa 25% pabor sa mga dumuluong nga empresa kag kasosyo sini nga mga daku nga burgesyia kumprador. Ginalauman nga mabuhinan sang ₱251 bilyon ang ginakulekta nga buhis nga pat-ud ipaabaga sa mga mamumugon kag mga may manubo nga kita sa porma sang bag-o nga mga buhis o dugang nga palas-anon nga dumuluong nga utang.

Ginapabugal ang Create Law nga yabi sa pagganyat sang mga dumuluong nga mamuhunan, nga sala nga ginalaragway nga makina sa pag-uswag sang ekonomya, bisan sa panahon nga ang pangkalibutanon nga sistemang kapitalista nagaluya sa bilog nga kalibutan. Sang nagligad nga tuig, ang aplikasyon para sa dumuluong nga pamuhunan sa Pilipinas nagsadsad sa 71% halin ₱370.11 pakadto ₱112.12 bilyon. Ang matuod, ang mga dumuluong nga pamuhunan, kadam-an sa mga empresa nga pang-eksport wala nagaamot sa pagpabaskog sang pundasyon sang ekonomya, kag nagahimulos lang sa barato nga kusog pangabudlay kag dunang manggad sang pungsod.

Bangud sa korapsyon, militarismo kag pagsandig sa dumuluong nga utang, pat-ud nga magaanus ang banwa sa labing paggrabe sang krisis sa ekonomya kag sang nagapadayon nga bunal sang pandemya sa maabot nga mga tuig. Ang mapintas nga mga *lockdown* kag lapnagon nga kawad-on sang trabaho nagadulot sang grabe nga pagkalisod sang masa, nagagatong sa lapnagon nga kaakig, nagadabuk sa ila nga magbato kag nagabuyok sa nagadamo

nga pumuluyo nga mag-entra sa armadong paghimakas para batuan kag patalsikon ang rehimeng US-Duterte.

Ginakuha ni Duterte ang suporta sang bag-o nga gubyernong Biden sang US sa iya pasistang rehimen. Gintanyag niya ang pagdula sang “terminasyon” sang Visiting Forces Agreement (VFA) ukon paghimo sang bag-o nga kasugtanan nga magahatag sa US sang lubos nga kinamatarung nga magsulod-guwa sa pungsod kabaylo sang mas daku nga ayuda militar. Gindeklarar niya nga sugot siya nga magtambak ang US sang armas sa pungsod para mangin estratehiko nga *outpost* sini sa rehiyon. Para ipakita ang suporta sang US, nangako ang Pentagon sang US nga pataason ang ayuda militar kag pagbaligya sang mga helikopter kag iban pang kagamitan militar, nga ginkalipay sang militar sang Pilipinas.

Samtang nagahatag sang ayuda militar sa rehimeng Duterte, nagapabaskog nga ginaduso sang US ang gubyerno sang Pilipinas nga paatrasan ang nagadaku nga impluwensya sa pulitika, interes sa ekonomya kag pagpasilabot militar sang China. Samtang padayon nga nagaduko ang rehimen sa dikta sang China, may mga maki-US nga upisyal nga nagabato sa China, pareho sang ginpakita nga kanselasyon sang proyekto nga erport sa Sangley Point kag ang hayagan nga protesta sa layi sang China nga nagapahanugot nga mapalukpan ang mga salakyan pangdagat nga indi Chinese.

Pero napaslawan pa sila sa pagkontra sa pito ka artipisyal nga isla nga gintukod sang China bilang mga base militar sa West Philippine Sea kag batuk sa pagtukod sang mga torre sang *cellphone* nga uyat sang China nga Dito-Telecom sa sulod sang mga kampo militar sang AFP, bisan mabaskog nga ginapamatukan sang maki-US nga mga upisyal. Ginapabaskog sang China ang mga pangmilitar kag diplomatiko nga kontra-tikang paagi sa pagtipon sang pwersa militar sini sa South China Sea upod ang pag-angkla

sang masobra 220 salakyan nga milisya sa Julian Felipe Reef, nga ara sa eksklusibo nga sonang pang-ekonomya sang Pilipinas.

Bangud sa kagrabe sang krisis sang nagaharing sistema, nagagamay ang resorsa pang-ekonomya kag pangpulitika para sa partehanay sang nagkalinlain nga paksyon sang nagaharing sahi. Pareho sa nagtaliwan, nagahandum ang nagaharing guban Duterte nga palawigon ang kaugalingon sa poder agud padayon nga magkuripon sang manggad kag gahum paagi sa mga operasyon nga burukrata kapitalista. Bangud sa krisis, labing nagabaskog ang duso nga monopolisahan ang gahum pangpulitika kakumbinar sa awtoritarianismo sang tirano nga si Duterte.

Ang iskema ni Duterte nga ipapanaog ang pasistang diktadurya sa pumuluyo kag palawigon sa poder ang iya dinastiya pangpulitika kag nagaharing guban ginalakipan sang pagbag-o sa konstitusyon ukon sang hayagan nga deklarasyon sang layi militar ukon “rebolusyonaryong gubyerno” (isa ka pag-agaw sa absoluto nga gahum). Pwede man sini nga pilion nga padayunon kag dayanon ang eleksyon presidensyal sa 2022 para papungkuon ang anak nga babaye ukon pangpulitika nga suluguon ni Duterte. Ang kasosyo nga TIM partner sang Smartmatic ginreport nga nabakal na sang iya tawu-tawo nga si Dennis Uy para makontrol ang isipay sang boto sa eleksyon 2022 pareho sang ginhimo sang 2019.

Kritikal nga bahin sang iskema ni Duterte nga maghari bilang pasistang diktador ukon palawigon ang iya pagginahum nga dinastiya amo ang pagtapna sa ligal nga demokratiko nga kahublagan kag pagpasingki sang kontra-rebolusyonaryong gera sini. Katuyuan sini nga piangon ang mga pwersa nga pungsodnon-demokratiko kag sa sini paluyahon ang malapad nga kubay sang mga pwersang demokratiko nga nagabato sa iya tiraniko nga rehimen. Katuyuan man sini nga konsolidahon ang kontrol sa militar kag pulis paagi sa

paghatag sa ila sang dugang nga gahum.

Labi nga nangin brutal kag makamamatay ang mapiguson nga gera ni Duterte. Ginadireher ini sang National Task Force to End Local Communist Armed Conflict (NTF-ELCAC), ang iya nga hunta sibil-militar, nga subong nagakontrol sa bug-os nga burukrasya kag armado nga makinarya sang estado. Bangud sa Anti-Terror Law kag pagpangdabuk ni Duterte nga “patyon tanan”, labi nga nagabaskog ang buot sang mga pwersang pulis kag militar nga himuon ang sige-sige nga pagpamigos, nga ginakinaiyahan sang koordinado nga reyd, mada-muan nga pagpang-aresto kag mga masaker. Sa nagligad nga mga bulan, ginsalakay sang AFP kag PNP ang mga balay kag upisina sang mga lider masa kag aktibista sang mga ligal nga indi komunista nga organisasyon sa Panay, Southern Tagalog, Bicol kag Northeast Mindanao, pagkatapos ang kasunod nga mga reyd sa Negros kag National Capital Region nga ginatawag Synchronized Enhanced Management of Police Operations (SEMPO). Tanan nga biktima gin-*red-tag* sang NTF-ELCAC. Samtang labing nagaathag ang mga iskema ni Duterte nga ipabilin ang kaugalingon kag iya dinastiya sa poder sa mga maabot nga bulan, posible nga mas masunson kag mas mapintas nga pagpanalakay ang pagahimuon sa mas madamo nga rehiyon.

Halos apat ka tuig na nga nagapintas nga nagapintas ang kontra-rebolusyonaryong gera sang rehimeng US-Duterte nga may katuyuan nga tapnaon ang masang mangunguma kag lutuson ang BHB. Ginagamit sini ang pinakamahigko kag pinakabrutal nga mga taktika sang pagpamigos batuk sa masang mangunguma sa idalom sang gintangub

nga Oplan Katatagan sang AFP kag PNP. Bug-os nga mga baryo kag komunidad ang ginpaidalom sa paggarison sang militar kag estilo nga hamlet nga pagkontrol. Ginpaidalom ang mga manguguma sa ekstrahudisyal nga pagpatay, ilegal nga paghalughog kag pagpang-aresto, mga interogasyon, pagblokeyo sa pagkaon kag ekonomya, pilit nga pagpang-rekrut, karpyu, pagtimalos kag kolektibo nga pagsilut pagkatapos sang mga taktikal nga opensiba sang BHB, kag wala untat nga mga kampanya sang intimidasyon kag saywar (“community support program,” pilit nga “madamuan nga pagsurender,” E-CLIP, BDP) sa napaslawan nga paglaum nga utdon ang angut sang BHB kag baseng mangunguma sini.

Padayon nga ginapadasig sang rehimeng Duterte ang pagpalapad sang makinarya sang AFP kag pagbakal sang mga bag-o nga mga armas militar samtang nagalunsar ini sang wala untat nga pungsodnon nga mga opensiba batuk sa BHB. Sa pihak sang kabos sa badyet kag gilayon nga kakinahanglanon nga pondohan ang mga programa para sa pangpubliko nga ikaayong lawas kag pagpapagsik sang produksyon pang-ekonomya, binilyon nga piso ang gin-usikan sang rehimeng Duterte para sa dugang nga mga helikopter, *drone*, eroplano panggera, misayl, bomba, kanyon kag armas pangkombat. Nagtalana ini sang masobra ₱19 bilyon para sa NTF-ELCAC bilang *pork barrel*.

Naglunsar ang kaaway sang sunud-sunod nga mga malaparan nga mga opensiba militar halin 2018. Ang mga “nakapokus” nga operasyong kombat kag saywar, kinaan-dan nagasakup sang pila ka banwa, pila ka pulo nga mga barangay sa mga dulunan sang mga banwa ukon prubinsya, kag ginapahulag ang pila ka gatos nga tropang impantri sang

gintangub nga duha ukon pila ka batalyon sang AFP kag mga tropang pangkombat sang PNP. Ang mga ini suportado sang paniktik sang *drone* kag ang sobra kag pataratas nga paggamit sang pagpamomba halin sa kahanginan kag pagpanganyon sang mga mamag-an kag mabug-at nga artileri, nga hayagan nga nagabalewala sa kaluwasan sang mga sibilyan nga nagaestar sa kaiping nga mga komunidad. Kakumbinar ini sang wala untat nga kampanyang saywar kag pagpamigos batuk sa masang mangunguma kag mga komunidad sang minorya sa katuyuan nga dumugon kag kugmaton ang pumulu-yo.

Sa desperado nga pagtinguha nga maagum ang deklaradong katuyuan nga dugmukon ang BHB antes matapos ang termino ni Duterte, nagalunsar ang AFP sang todo nga pungsodnon nga opensiba nga nagapahulag sa halos 150 batalyon sang AFP kag mga tropang pangkombat sang PNP, kon sa diin masobra 80% nakakonsentrar sa walo ka prayoridad nga rehiyon, nga may 14 tubtob 20 batalyon kada isa. Halin sang nagligad nga tuig, gintuyo sang AFP nga makarekrut sang indi magnubo sa 9,000 dugang nga mga pwersa nga paramilitar bilang pangdugang sa 70,000-tinawo nga CAFGU.

Bisan pa man, mapaslawan ang kontra-rebolusyonaryong gera kag todo nga opensiba sang kaaway samtang nagapursiger ang Bagong Hukbong Bayan sa dalan sang inaway banwa, nagapalapad kag nagakonsolida sang baseng masa sini kag nagapabaskog sang kaugalingon sa militar kag pulitika. Labi pa nga ginahayag sang pagkabrutal sang gera sang kaaway ang kagarukan sang malakolonyal kag malapyudal nga sistema kag ginapukaw ang mada-lom nga kaakig sang masa sa mga pasista kag sa nagaharing sistema.

Nagapursiger ang BHB sa tunga sang todo nga kontra-rebolusyonaryo nga pagpamigos

SA TUNGA SANG KONTRA-REBOLUSYONARYO nga gera kag malaparan nga opensiba militar sang AFP kag PNP nga suportado sang US, padayon nga nagapursiger ang Bagong Hukbong Bayan sa dalan sang malawigan nga inaway banwa nga nagaangkon sang madalom kag malapad nga suporta sang masang mangunguma kag sang pumuluyong Pilipino. Ginpaslaw sini ang tuigan nga deklarasyon nga plano sang rehimeng US-Duterte nga “lupigon ang BHB”. Determinado ini nga paslawon ang plano sang rehimen nga tapuson ang armadong rebolusyon antes matapos ang termino sini kag isulong ang demokratiko nga rebolusyon para ibagsak ang makasahi nga paghari sang imperyalismong US, daku nga burgesyia nga kumprador kag daku nga agalon nga mayduta.

Sang gintukod ini sang Marso 29, 1969, may 60 hangaway lang ang BHB nga may siyam ka ripleng awtomatik kag 26 nga manubo-klase sang pusil kag may baseng masa nga 80,000 sa palibot sang ikaduha nga distrito sang Tarlac. Sa pagsimpon sang armadong paghimakas, rebolusyong agraryo kag pagtukod sang baseng masa, nag-uswag ang BHB padulong sa isa ka nasyunal nga hangaway nga may pila ka libo nga bataan nga Pulang hangaway nga naghalin sa kubay sang pigos kag ginahimuslan nga masa. Naarmasan sila sang mga mataas nga kalibreng riple nga naagaw halin sa kaaway, amo man sang kaugalingon nga himo nga mga eksplosibo kag lokal nga mga hinganiban. Sa baseng masa sini nga nagadamo sa minilyon, nakahulag ang BHB sa masobra 110 prenteng gerilya nga tuyo nga dugangan pa.

Gintukod kag ginapalig-on sang Partido ang BHB agud tungdan ang pangunahon nga rebolusyonaryong katungdanan nga agawon ang pangpulpitika nga gahum paagi sa pagdugmok sa reaksyunaryong estado kag pagtukod sang demokratiko nga gubyerno sang banwa. Para pauswagon ang BHB halin sa pwersa nga gamay kag maluya, padulong sa hangaway nga daku kag mabaskog, ginapatuman sang Partido ang estratehikong linya sang malawigan nga inaway banwa sang pagpalibot sa kasyudaran halin sa kaumhan. Ginauyatan kag ginapatuman sini ang prinsipyo sang sentralisado nga pagpamuno kag desentralisado nga operasyon bilang pamaagi sang pag-

lunsar sang rebolusyonaryong gera sa pulo-pulo nga Pilipinas. Magauswag sa tatlo ka halintang ang malawigan nga inaway banwa: estratehikong depensiba, estratehikong pagkapatat sang estratehikong opensiba. Posible nga pagasakupon sang halintang sang estratehikong depensiba ang pinakamalaba nga panahon sa diin kinahanglan sang BHB nga magtipon sang armadong kusog paagi sa paglunsar sang lapnagon kag maikit nga pagpakig-away gerilya sa basehan sang nagapalpad kag nagapadalom nga baseng masa.

Sa paglunsar sang malawigan nga inaway banwa, ginasimpon sang BHB ang tatlo ka sangkap sang armadong paghimakas, rebolusyong agraryo kag pagtukod sang baseng masa. Sa armadong paghimakas, nagalunsar ang BHB sang mga taktikal nga opensiba, nga ginapili lamang ang mga inaway nga pat-ud sini nga mapadaug nga nagatarget sa mga nahamulag kag maluya nga bahin sang armadong pwersa sang kaaway. Nagagamit ini sang mga pamaagi nga gerilya sang pagkonsentrar sang pwersa para magbanat, pagdispers agud dulaan ang kaaway sang mapuntariya nga target kag pagsaylo sang erya agud maglikaw sa pagreyd sang kaaway. Sa tanan nga panahon, ginalikawan sang BHB nga matultulan sang kaaway gamit ang kadutaan kag pagsalig sa masa.

Sa paglunsar sang rebolusyong agraryo, ginapatuman sang BHB ang Rebolusyonaryo nga Ubay sa Reporma sa Duta sang Partido. Sa halin-

tang sang estratehikong depensiba, ginapukaw, ginaorganisa kag ginapahulag sang BHB ang masang mangunguma sa mga paghimakas masa kag kampanyang masa para sa pagpanubo sang renta sa duta, pagpanubo sang interes sa mga pautang, pagtaas sang sweldo sang mga mamumugon sa agrikultura kag mamumugon sa uma, pagpataas sang presyo sang ani, pagpanubo sang renta sa mga kagamitan sa panguma, pagtukod sang mga kooperatiba kag grupo nga binuligay para mapataas ang produksyon kag kita halin sa mga trabaho nga saydlayn. Sa mga nagligad nga tuig, ang mga kadutaan nga ginbayaan ukon ginhatag sang mga agalon nga mayduta ginaokupar kag ginadumalahan sang mga organisasyon sang mangunguma sa bulig kag ubay sang BHB kag lokal nga mga sanga kag mataas nga komite sang Partido.

Sa pagtukod sang rebolusyonaryo nga baseng masa, ginaorganisa sang Partido kag BHB ang lokal nga mga sanga sang Partido, mga rebolusyonaryo nga organisasyong masa sang mangunguma, pamatan-on, kababainhan kag mga bata, mamumugon pangkultura, kag pangbaryo nga yunit milisya sang BHB. Sa basehan sang organisado nga kusog sang masa, ginahiwat ang mga asembleya ukon kumperensyang masa para magboto sang komite nga rebolusyonaryo sa baryo nga may katungdanan nga magdumala sa lokal nga mga polisiya nga nagasakop sa reporma sa duta kag produksyon, polisiya sa ikaayong lawas, edukasyon, halambalanon militar, kalinungan kag katawhayan, kag iban pa. Nagaserbi ang mga komite nga ini bilang binhi sang demokratiko nga gubyerno sang pumuluyo nga lubos nga tukuron sa panahon sang pungsodnon nga pag-agaw sa gahum pangpulpitika.

Nag-uswag ang malawigan nga inaway banwa halin sa maaga nga subyugto sang estratehikong depen-

siba pakadto sa tunga nga halintang halin sang tunga-tunga sang dekada 1980. Sa amo man, nag-agi sang malubha nga pag-atras kag pagkapaslaw sa ulihi nga bahin sang dekada 1980 tubtob maaga nga bahin sang dekada 1990 bunga sang mga kasaypanan sang adbenturismo militar kag indi napanahon nga regularisasyon ukon pagtukod sang mga pwersa nga bertikal nga wala sang katumbas nga kadakuon sang mga pwersa nga horisontal. Ginpahina sang sobra nga pagtipon sang mga pwersa para sa hilikuton militar ang mga pagtinguha sa pagtukod sang baseng masa kag ginhimo ini nga bulnerable sa mga atake sang kaaway kag mga kapaslawan sa inaway. Gintuyo sang mga rebisyunista kag traydor nga sistematiko nga talikdan ang estratehikong linya sang inaway banwa paagi sang pagtiko sa pag-analisa sang Partido sa katinglan nga Pilipino, mga sahi kag moda sang produksyon sa katuyuan nga dal-on ang mga rebolusyonaryong pwersa sa dalan sang pagkalutos.

Ginlunsar sang Komite Sentral sang PKP ang Ikaduha nga Dungganon nga Kahublagan sang Panadlong sang 1992 para liwat nga palig-unon ang basehang mga prinsipyo sang Partido, ang pag-analisa sini sa malakolonyal kag malapyudal nga kahimtangan sa pungsod kag programa sini para sa demokratiko nga rebolusyon sang banwa paagi sa paglunsar sang malawigan nga inaway banwa. Sa partikular, ginsikway kag gingabot sini ang ugat sang insureksyunismo kag indi napanahon nga regularisasyon kag ginmanduan ang BHB nga liwat ideploy ang mga pwersa sini para balansehon pareho ang hilikuton pangmilitar kag pangpulpitika ukon hilikuton masa.

Ang 5-tuig nga plano sang Komite Sentral (2018-2022) nagatuyo nga kumpletuhon ang mga rekisito sang tunga nga bahin sa halambalanan sang pagtukod sang platun bilang basehang pormasyon, sang numero kag latag sang mga prenteng gerilya, sang husto nga balanse

sang bertikal kag horisontal nga mga yunit sa istruktura sang pwersa sang BHB, sang nagapanguna nga anihilatibo nga kinaiya sang mga taktikal nga opensiba nga may katumbas nga lapnagon nga mga atri-tibong aksyon, husto nga pagsimpon sang armadong paghimakas, rebolusyong agraryo kag pagtukod sang baseng masa, kag paglubad sa nagkalainlain nga tipo sang “Wala” kag Tuo nga kahuyangan.

Ginatuyo sang Partido nga lubaron ang mga disbalanse sa tunga sang mga hilikuton militar kag pangpulpitika nga nagpugong sa sostenido nga pagdaku sa nagligad nga mga tuig. Lakip sa mga ini ang problema sang sobra nga pagdispers kag sobra nga pagsakup sang mga yunit sang BHB sa isa ka bahin, kag ang problema sa sobra nga konsentrasyon kag pagpakitid sa pihak nga bahin. Sa pila ka erya, nakapalapad kag nag-angkon sang mga kadalagan sa militar ang BHB apang napaslawan nga pahulagon ang mga mangunguma sa sostenido nga antipudal nga mga paghimakas. Sa ibang erya, ang mga yunit sang BHB sobra nga nakalapta para sa hilikuton masa apang napaslawan sa hugot nga pagkumbinar sini sa pagtukod sang hangaway kag sa armadong paghimakas. Sa anuman nga kaso, nangin mabudlay ang pagsustenir sa mga kadalagan nga naagum sa mga patag militar ukon pangpulpitika kag ginbukas ang hangaway sang banwa kag baseng masa sa mga kahinaan kag pag-atras.

Ginatinguhaan sang nagapamuno nga mga komite sang Partido kag mga sentro sa kumand sang BHB nga abuton ang husto nga balanse sa pagtalana sang ila nga mga pwersa, sa paghimo sang hilikuton militar kag pangpulpitika kag sa pagpalapad kag pagkonsolida. Kadungnan sini, halin katapusan sang 2017, gin-atubang nila ang wala sang untat nga mga atake kag masupog nga kampanya sang kontra-rebolusyonaryo nga pagpamigos nga ginalunsar sang kaaway batuk sa masang mangunguma kag hangaway

sang pumuluyo. May pila ka bahin sang BHB kag sang baseng masa ang nag-angkon sang mga kahalitan sa atubang sang wala untat kag lapnagon nga mga atake sang kaaway nga nagpalala sa internal nga mga kahinaan kag bulnerabilidad. Bisan pa man, ang daku nga mayorya sang mga kumand sang BHB sa bilog nga pungsod ara sa pusisyon pa gihapon nga pamunuan ang hangaway sang banwa sa paglunsar sang lapnagon kag maikit nga pagpakig-away gerilya sa basehan sang nagapalapad kag nagapadalom nga baseng masa. Nagapauswag sila sang mga pamaagi kag taktika para ipreserba ang ila nga pwersa, pangapinan ang masa kag birahon ang mga pasistang kriminal kag manugpatay-tawo.

Linibo nga hilo ang nagabugkos sa BHB kag sa masang mangunguma. Nagapabilin nga malig-on ang mga ini sa pihak sang wala sang untat nga mga pagtinguha sang mga pwersa sang kaaway nga utdon ang mga ini. Nagpatuman ang BHB kag ang masa sang mga pamaagi para padayunon ang mga rebolusyonaryong hilikuton-- pag-organisa, edukasyon, propaganda, kampanyang masa, pagtukod sang Partido, pagpatapu sa BHB—bisan pa sa idalom sang ilong sang kaaway. Sa pagbato kag pagpangibabaw sa garison militar kag kampanyang saywar sang kaaway, nagkuha sang mga leksyon kag inspirasyon ang BHB kag masang mangunguma sa inagihan sang pumuluyo kag rebolusyonaryong pwersang Byetnames para batuan kag pangibabawan ang mga pasista nga hamlet.

Nagatinguha man ang mga yunit sang BHB sa hilikuton nga pagpalapad para palaparon ang erya sang operasyon sang mga prenteng gerilya kag tukuron ang bag-o nga mga prenteng gerilya. Sa paghimo sini, napalapad sang BHB ang erya sang maniobra, napwersa ang kaway nga labi pa nga hitaron sang manipis ang mga pwersa sini kag himuon nga mas mabudlay kag magasto ang mga pagreyd sang kaaway sa mga yunit sang BHB. Bisan sa mga erya nga

ara sa idalom sang prayoridad sang kaaway, madinalag-on nga nakapalpad ang mga yunit sang BHB sa bag-o nga teritoryo ukon indi gani nabawi ang daan nga mga erya. Sige-sige nga ginadumalahan sang mga kumand sang BHB kag komite sang Partido ang pagtalana sang mga pwersa sini para likawan ang problema sang sobra nga pagdispers ukon pagpakitid.

Uyat ang malapad nga suporta sang masa kag pagkabisar sa te-reyn, padayon nga nagatinguha ang BHB nga pangibabawan ang mga nakapokus nga operasyong militar kag maglunsar sang mga taktikal nga opensiba, nga nagabira sa mga separado o nahamulag nga mga hedkwarter sang kaaway. Determinado ini nga maglunsar sang mas madamo pang anihilatibo nga mga taktikal nga opensiba (ambus kag reyde) nga may nagapanguna nga katuyuan nga agawon ang armas sang kaaway, kag ginatumbasan sang mga atritibong aksyong militar (haras, isnayp kag demolisyon sa mga pasilidad sang kaaway).

Ang pagpursiger sang BHB nga maglunsar sang rebolusyonaryo nga armadong paghimakas nagahatag

inspirasyon kag nagapabaskog sa buot sang masa nga maglunsar sang mga anti-imperyalista, antipyudal kag antipasistang mga paghimakas masa kag batuan ang pasista nga rehimeng US-Duterte kag ang paghari sini sang terorismo sang estado sa tunga sang malubha nga sosyo-ekonomiko nga krisis kag nagalala nga mga porma sang pagpamigos kag pagpanghimulos sa idalom sang malakolonyal kag malapyudal nga sistema.

Sa kaumhan, nagabaskog ang buot sang masang mangunguma kag minorya nga mga komunidad nga maglunsar sang mga paghimakas antipyudal kag batuan ang pagpangagaw sang duta kag pagsulod sa mga duta nga anestrang sang mga daku nga agalon nga mayduta, daku nga kumpanya sa pagmina, ekoturismo kag enerhiya. Ang mga imol nga mangingisda nagakapukaw nga ipakig-away ang ila mga kinamatarung kag kaayuhan batuk sa pagagaw sang daku nga komersyal nga mga pagpangisda kag pagsulod sang mga Chinese nga suportado sang ila estado sa mga palangisdaan sang pungsod.

Sa kasyudaran, padayon nga

nagalapad ang mga demokratikong pwersa nga nakahanay batuk sa tiranikong rehimen. Gintukod ang aliyansa sang konserbatibong oposisyon kag mga progresibo kag demokratikong pwersa para hangkaton ang dinastiyang Duterte sa eleksyon 2022. Kadungan sini, padayon nga nagalunsar ang pigos nga mga sahi kag demokratikong sektor sang mga kampanya kag paghimakas masa para ipakigbato ang ila nga kinamatarung kag kaayuhan. Nagapanawagan sila sang dugang-sweldo, luwas nga lugar-trabahuan, bayad peligro, gilayon nga ayuda pang-ekonomya para mapun-an ang nadula nila nga kita dulot sang mga *lockdown* kag restriksyon, dugang nga sweldo para sa mga mamumugon medikal, titser kag empleyado, dugang badyet para sa luwas nga pagbukas sang mga eskwelahan, libre nga *mass testing* kag libre nga malaparan nga pagpabakuna batuk sa Covid-19 kag iban pa. Nagapakita sila sang kalig-on kag kaisog sa pagbato sa todo nga teroristang mga atake sang mga pwersa sang estado. Madamo sa ila ang napukaw nga mag-entra sa BHB ukon magdangup sa mga baseng gerilya sang BHB.

Magpursiger nga abagahon ang mga hilikton sa pagbato sang BHB

SA PALAABUTON NGA MGA TUIG, dapat magpursiger ang Bagong Hukbong Bayan nga isulong ang kritikal kag mga mabudlay nga hilikton para isulong ang interes kag kaayuhan sang masang mangunguma kag pangapinan sila batuk sa mga abuso kag atake sang mga pwersa sang estado, pabaskugon ang BHB, paslawon ang mapintas nga kontra-rebolusyonaryong gera kag padayon nga isulong ang inaway banwa sa mas mataas nga lebel. Ginapangayo sang sitwasyon sa taga ka Pulang hangaway kag kadre sang Partido ang daku nga sakripisyo kag salsalon nga disiplina, amo man ang determinasyon, kakahas, pagkamatinugahon kag wala sang katapusan nga pagsalig sa masa.

Sa pagbato sa kaaway, ginauyatan sang BHB ang estratehikong linya sang malawigan nga inaway banwa kag hugot nga ginahugpong ang masa kag bug-os nga kusog nga nagabato katuwang nila. Ginasiguro sini ang pungsodnon nga latag sang armadong pagbato, amo man ang latag sini sa kada rehiyon kag subrehi-

yon. Ang Partido kag ang BHB naga-gamit sang Marxista-Leninista-Maoista nga panan-awan kag mga pamaagi para solbaron ang gilayon nga mga problema sa pagsulong sang inaway banwa, amo man sa kasaysayan sang rebolusyonaryong paghimakas sa Pilipinas.

Dapat padalumon kag pabasku-

gon sang BHB ang rebolusyonaryo nga baseng masa. Ini ang yabi sa pagpaslaw kag pagpangibabaw sa kontra-rebolusyonaryong gera sang kaaway. Dapat labi pa nga hugton ang angut sang BHB sa masa paagi sa lubos nga pagsulong sa antipyudal nga kahublagang masa bilang yabi sa pagpukaw, pag-organisa kag pagpahulag sa masang mangunguma sa kaumhan. Dapat pirme nga hatagan sang atensyon sang BHB ang kaayuhan sang masang mangunguma kag pinakamataas nga prayoridad ang pagsulong kag pagpatuman sa ila nga mga demanda nga antipyudal sandig sa linya sang minimum sa programa sang Partido sa reprograma sa duta. Dapat tinguhaon sang

BHB kag mga rebolusyonaryong pwersa sa kaumhan nga madamuan nga pahulagon ang masang mangu-nguma para ipakig-away ang ila nga mga kinamatarung kag kaayuhan kag iduso ang pagtapos sa kontra-mangunguma nga mga polisiya, regulasyon kag mga layi; kag maglunsar sang mga kampanya para pataason ang produksyong agrikultural kag kita labi na sa tunga sang malubha nga krisis sa ekonomya. Dapat wala sang kakapoy ang hilikuton propaganda kag edukasyon sa kubay sang masa para pataason ang ila nga kamuklatan pangpulitika, pukawon ang ila kaakig kag palig-unon ang ila nga determinasyon nga magbato. Ang tanan nga yunit sang BHB dapat nakaangut sa masang mangu-nguma kag nagatungod sang ila nga mga hilikuton bilang mga giya pangpulitika, brigada pangproduksyon, doktor kag dentista, titser, mamumugon pangkultura kag iban pa nila nga hilikuton bilang hangaway sang pumuluyo.

Dapat pirme nga tinguhaon sang BHB nga makig-isa sa masang mangunguma, pangunahon nga nagsalig sa imol kag manubo nga nahanunga nga mga mangunguma kag mamumugon sa uma, ginahabig ang mga nahanunga nga nahanunga nga mangunguma, kag ginanyutralisa ang manggaranon nga mangunguma kag nasanagan nga mga agalon nga mayduta, ginahingalitan ang mga kontradiksyon sa tunga sang mga nasanagan kag despotikong agalon nga mayduta para ihamulag kag waskon ang gahum sang mga pyudal nga mga despotiko.

Dapat gitgitan nga batuan sang BHB kag masang mangunguma ang mga atake sang kaaway, kag ang okupasyon kag paggarison sa mga baryo. Dapat wala sang kakapoy kag matinugahon nga maglunsar sang pangpulitika nga mga hilikuton sa kubay sang masa para pataason ang ila nga determinasyon nga batuan ang kampanya sang todo nga pagpamigos sang kaaway. Dapat pakamalauton kag batuan ang presensya sang abusadong mga tropa sang mi-

litar kag pulis sa mga sibilyan nga komunidad nga wala sang untat sa pagpang-ipit kag pag-abusar sa masa. Siguruhon nga wala-untat ang rebolusyonaryo nga propaganda, edukasyon kag kampanya bisan pa may mga pwersa militar sa mga baryo. Dapat pangibabawan ang ginapapanaog nila nga mga pasistang restriksyon paagi sa santo nga mga pamaagi sang sikreto nga komunikasyon kag mga pagtipon, amo man sang taktika sa hayag nga pagsupak, pagbato kag paghimakas. Dapat padayon nga tukuron kag pabaskugon ang lokal nga mga sanga sang Partido, rebolusyonaryo nga mga organisasyong masa kag mga yunit sang milisyang bayan. Dapat magbalay ang masa sang nagkalainlain nga taktika sang pagbato para isulong ang ila nga mga paghimakas sosyo-ekonomiko kag magprotesta batuk sa armadong presensya kag pagpang-abuso sang kaaway sa ila nga mga baryo. Dapat ikumbina ang mga ini sa armadong mga aksyon nga ginalunsar sang mga yunit sang BHB, kakoordinar ang mga yunit sang milisyang bayan. Ang kapintas sang mga pwersa sang AFP kag PNP sa kaumhan dapat aktibo nga ibuyag-yag sa midya kag *social media*.

Dapat padayon nga pabaskugon sang Bagong Hukbong Bayan ang pagrekrut sa bag-o nga mga Pulang hangaway halin sa masang mangunguma, amo man sa mga mamumugon kag petiburges nga intelektwal sa kasyudaran. Katungdanan sang mga sanga sang Partido nga ganyaton ang mga kadre kag katapu sang Partido, masang aktibista, mga katapu sang mga yunit milisya nga nagentra sa BHB, kag maglista sang mga rekomendado para sa hangaway sang banwa. Katuwang ang mga yunit sang BHB, responsable man sila sa pagsiguro nga ang pamilya sang mga Pulang hangaway maayo nga ginaasikaso kag regular nga nahatagan sang suportang materyal kag pinansyal. Mahimo nga may ara sang tatlo ukon anom ka bulan nga *tour-of-duty* ukon integrasyon sa hangaway ang mga kata-

pu sang yunit milisya para dugangan ang pwersa sang mga lokal nga yunit sa mga prenteng gerilya sang BHB. Dapat hatagan sang partikular nga tum-ok ang rekrutment sang mga mamumugon kag pamatan-on nga intelektwal para makabulig sa pangideolohiya kag pangpulitika nga paghanas sa BHB. Ang mga masang aktibista sa kasyudaran kag sentro nga banwa, labi na ang mga ginaipit sang pasistang rehimen, dapat ganyaton nga mag-entra sa BHB ukon magdangup diri.

Dapat tanan-nga-bahin nga pabaskugon sang BHB ang iya kaugalingon. Dapat regular nga maglunsar ang mga yunit sini sang pulitiko-militar nga paghanas para pataason ang ikasarang sang mga Pulang hangaway. Dapat sini nga pataason ang ila nga kamuklatan pangpulitika kag kahandaan sa ideolohiya paagi sa wala-kakapoy nga propaganda kag edukasyon sa ila nga kubay. Dapat siguruhon ang pagpanagtag sang *Ang Bayan* kag kolektibo nga pagtalakay sini kag sang mga pahayag sang Partido kag pangrehiyon nga mga publikasyon sa tanan nga mga yunit sang BHB. Dapat abuton ang 100% literasi sang tanan nga Pulang hangaway. Dapat siguruhon ang ila nga ikaayong lawas pisikal kag mental. Dapat maghimo ang taga ka yunit sang BHB sang pagsaway kag pagsaway-sa-kaugalingon para pangibabawan ang mga kahinaan kag pabaskugon ang paghiliusa kag pagsalig sa kada isa. Dapat pataason ang ikasarang sang kada yunit sang BHB nga magpamuklat, magorganisa kag magpahulag sang masa paagi sa pagpabaskog sang ila nga kapasidad sa paghimo sang pangkatilingban nga pagpanyasat, propaganda, edukasyon, kag mga kampanyang masa. Ang tanan nga mga yunit dapat regular nga maglunsar sang ehersisyong pisikal, pagtiro, paghanas pangkombat kag mga *war game* para pataason ang ila nga pagkaalerto, kag ikasarang nga dululungan nga paghulag.

Dapat pabalud-balod nga magpalapad ang BHB sang teritoryo

ukon erya sang mga operasyon sini, samtang ginabalanse ang pagpalapad kag konsolidasyon. Sa isa ka bahin, indi sini dapat pabayaang nga malawigan nga mahigot ang mga yunit sini sa limitado nga erya sang operasyon; kag, sa pihak nga bahin, indi dapat sini sobra nga hitaron ukon laptahon ang mga yunit sang BHB. Dapat regular nga rebyuhon sang mga nagapamuno nga komite sang Partido kag kumand sang BHB ang pagdeploy sang mga pwersa sang BHB sandig sa prinsipyo sa istruktura sang mga pwersa sang BHB kag mga layi sang pag-uswag sang pagpakig-away gerilya. Dapat planuhan sang mga kumand kag komite sang Partido sa lebel rehiyon, subrehiyon, kag prente ang kalendaryo kag programa para sa pagpalapad sang BHB para ikoordinar ang nagkalainlain nga mga yunit sang BHB kag ang kondukta sang gera. Dapat may ara nga plano para talambihon ang mga interyor nga erya sa kapatagan, network sang mga alagyan kag higad-baybay. Dapat pahulagon ang mga lokal nga katapu sang Partido, mga masang aktibista kag katapu sang milisyang bayan para magbulig sa pagpalapad sang BHB sa mga kaiping nga barangay kag banwa.

Dapat ilunsar sang BHB ang malapad kag maigting nga pagpakig-away gerilya. Dapat maglunsar ang BHB sang mga taktikal nga opensiba nga sigurado sini nga madasig nga mapadaog. Dapat pilion sini ang mga nakabulag, nahamulag kag maluya nga pwersa sang militar, pulis kag paramilitar bilang target sang anihilasyon para makaagaw sang mga armas kag suplay. Dapat planuhan man sang BHB ang mga detatament sang paramilitar sang kaaway, taktikal nga *outpost*, kag linya sang suplay. Dapat planuhan man nila nga atakehon kag samaron ang mga helikopter, *drone*, *bomber plane* kag iban pang kagamitan pangkahanginan sang kaaway. Mahimo nga padamuon kag paigtingon sang mga yunit pang-away sang BHB ang ila nga mga taktikal nga opensiba kag

magbunggo sa kaaway nga malipot lang ang panahon sang pahuway. Dapat man sila nga magtalana sang mga yunit ukon tim sang mga Pulang hangaway para maghimo sang mga atake batuk sa mga linya sa transportasyon kag komunikasyon sang kaaway. Dapat malapad nga mapahulag ang mga yunit milisya sang BHB para maglunsar sang mga taktikal nga opensiba sa malabot sang masarangan. Dapat ideploy ang mga yunit partisano sang BHB sa mga syudad kag sentrong banwa para sa pagaresto ukon pagsilut sa mga pasistang kriminal nga responsable sa kampanya sang madamuan nga pagpatay kag terorismo sang estado batuk sa masa.

Dapat paslawon sang BHB ang mga nakapokus nga operasyon militar kag todo nga opensiba sang kaaway, mga operasyong kombat kag saywar kag pagpamigos batuk sa masa. Dapat ubos-ikasarang nga dulaan-epetto ang malahalang nga mga kagamitan pangsarbeylans kag labi nga mabaskog nga mga armas paagi sang pagdingot sa kaaway sang mga target. Dapat ipabilin sang mga yunit sang BHB ang mataas nga lebel sang disiplina militar kag ipatuman ang mga istrikto nga tikang sang pagsikreto sa temporaryo nga mga kampo (agi, aso, suga kag gahod) kag sa paghulag para likawan nga mamutikan sang kaaway gamit ang mga iskawt, sarbeylans sang *drone*, pagsagap sa elektronikong kagamitan kag paggamit sang mga instrumento nga *geotracking*. Dapat ini nga magpawag sang bag-o nga sikreto nga mga ruta sang suplay. Dapat nga maglunsar ini sang kontra-paniktik kag bungkagon ang mga lambat sang espiya sang kaaway. Dapat maid-id nga bantayan kag analisisang sang BHB ang mga plano kag hulag sang kaaway, kag maglunsar sang mga gerilya nga maniobra para magpalayo sa pokus sang kaaway, maglikaw sa pagreyd sang kaaway kag pwersahon ang kaaway nga magsumbag sa hangin kag maguyang sang resorsa.

Dapat magtalana ang mga platoon sang BHB sang mga iskwad kag tim sang mga Pulang hangaway para magatake halin sa mga likuran ukon kilid sang kaaway para idiskaril ang mga plano kag hulag sini. Upod ang BHB, ang mga lokal nga sanga sang Partido kag rebolusyonaryo nga organisasyong masa dapat magplano kag maghimo sang mga taktika kag pamaagi sa pulitika kag militar para ibuyagyag, atubangon, batuan kag lutuson ang kampanya nga pagpamigos sang kaaway sa lebel sang mga komunidad kag interkomunidad. Dapat pahulagon ang mga yunit milisya kag komite sa pagpangapin sa kaugalingon para maglunsar sang malapad nga mga atakeng militar kag armadong aksyon para idiskaril ang mga plano nga opensiba sang kaaway.

Dapat pabaskugon sang Partido ang pagpamuno sini sa BHB sa tanan nga lebel. Dapat regular nga ilunsar ang mga kumperensya militar para makabayluhanay sang impormasyon ang mga kadre militar, magtasa kag magsuma sang mga inagihan, magkoordinar kag maghimo sang mga taktika kag mga plano sa erya sang ila operasyon. Dapat organisado ang mga sanga sang Partido kag regular nga makaandar sa sulod sang mga kumpanya kag platoon sang BHB. Responsibilidad sang mga sanga sang Partido nga pataason ang pangpulitika nga kamuklatan kag rebolusyonaryo nga determinasyon sang mga Pulang hangaway sang BHB kag pabaskugon ang ila nga paghiliusa, magpanguna sa pagsaway kag pagsaway-sa-kaugalingon kag sa pagpanibag-o sang kaugalingon.

Ang malubha nga krisis sa pulitika kag ekonomya sang nagaharing sistema pabor sa pagsulong sang inaway banwa. Ang malapad nga masa sang pumuluyong Pilipino nagakapukaw nga magbato para tapuson ang grabe nga pag-antus, kaimulon, gutom kag pagpang-abuso sa idalom sang tiraniko nga rehimen. Ang pungsodnon-demokratiko nga rebolusyon mas nangin kinahangla-

non kag gilayon sa atubang sang nagatalom nga krisis kag indi mabatas nga mga porma sang pagpamigos

kag pagpanghimulos. Para sa pumulyong Pilipino, wala sang iban nga pamaagi kundi ang paglunsar sang

rebolusyonaryo nga mga paghimakas para ibagsak ang mga nagapamigos kag nagapanghimulos sa ila.

Tapuson ang pasista nga rehimeng Duterte!

Magtinguha nga pabaskugon kag palaparon ang Bagong Hukbong Bayan kag ang baseng masa sini!

Paigtingon ang pagpakig-away gerilya kag paslawon ang mapintas

nga kontra-rebolusyonaryong gera sang kaaway!

Isulong ang inaway banwa!

Mabuhay ang Bagong Hukbong Bayan!

Mabuhay ang Partido Komunista sang Pilipinas!